

دائماً بحن لك يا.. أمه !!..

ودائماً بحن لك يا أمه ..

بحن لصوتك

وكلامك

ولمسة أيدي

وراحتك

وضمة صدرك

بحن لنظرة عنيني

وهيه بتبص ف عنيه

وتقرأ أفكاري وأسراري

في أقل من ثانية

ودايماً كنتي بتفهميني

وبتكشفيني

لو حاولت أكذب

أو من عنيك اهرب

وبكل حنيه

تطبطي عليه

وتقوليلي يا نور عنيه

ماتضحكش على أمك

اللي مربياك

وعجناك وخبزك

وأحكيلي ع اللي تعبك

ومتخبيش عليه

وقول كل اللي ف قلبك

عشان ترتاح

وهمك ده ينزاح

فلاقيني انتهت

وأتفكت عقدة لساني

وقولت : آه ياني

قلبي وجعني يامه

والدنيا معنداني

وحظي فيها قليل

وزماني نساني

فتضحكي وتضميني

وبحناتك تهديني

وبكلامك تقويني

وتبشريني

بأحلي بشره

باني بكره

هاحقق كل أحلامي

وأعيش أجمل أيامي

آه.. يا أمه...!!

يا عايشة في كياني

هافضل أحن لك

دائماً يا ست الكل

ياعود المسك والعنبر

يا طوق الفل..

يا طعم السكر

يا طاقة نور

في طبق بنور

وروح طاهره

لما علينا تدور

يروح الوجع منا

ونشم عبير الجنه

